

Samningur um samstarf Fjórðungssjúkrahússins á Akureyri og Landspítala - háskólasjúkrahúss

1. gr.

Aðilar samnings þessa eru **Fjórðungssjúkrahúsið á Akureyri (FSA)**, kt. 580269-2229 og **Landspítali - háskólasjúkrahús (LSH)**, kt. 500300-2130.

2. gr.

Markmið

Markmið samningsins er að styrkja uppbyggingu FSA og LSH í heilbrigðisþjónustu, kennslu og rannsóknum. Með samningnum eru skilgreind þau verkefni sem samningsaðilar ætla að eiga samstarf um, skipulag og þróun þeirra, hvernig staðið skuli að upptöku nýrra samstarfsverkefna og ábyrgðarsvið aðila.

3. gr.

Almennar forsendur samstarfs

Samstarf LSH og FSA leiðir af sér margvíslega samvinnu á sviði starfsmannamála. Þannig munu aðilar eiga samstarf um ákveðna starfsþætti og starfsmannaskipti. Skýra þarf því réttindi og skyldur aðila, bæði stofnananna og starfsmanna þeirra. Í samstarfinu er gengið út frá eftirfarandi forsendum.

1. Samningurinn tekur til starfsmanna sem hafa ráðningarsamning á annarri hvorri stofnuninni og vinna á hinni stofnuninni á grundvelli samnings þessa.
2. Einstakir samningar um þjónustu spítalanna skulu gerðir af hluteigandi framkvæmdastjórum og sviðsstjórum.
3. Komi fram ósk um að starfsmaður sem ráðinn er hjá öðrum aðila samnings þessa sinni afleysingastarfi hjá hinum aðilanum skal haft samráð við vinnuveitanda og fengið samþykki hans. Sá spítali sem starfið fer fram á ber ábyrgð á tjóni sem starfsmaður kann að valda í störfum sínum þar.

4. gr.

Skipulag

Yfirstjórn samstarfsins er í höndum samstarfsnefndar. Nefndin er skipuð þremur fulltrúum frá hvorum samningsaðila. Frá FSA sitja í nefndinni, forstjóri, framkvæmdastjóri hjúkrunar og framkvæmdastjóri lækninga eða fulltrúar þeirra. Frá LSH sitja í

nefndinni, forstjóri, framkvæmdastjóri lækninga og framkvæmdastjóri hjúkrunar eða fulltrúar þeirra. Stofnanir skulu skiptast á formennsku í nefndinni, eitt ár í senn.

Samstarfsnefnd fer með ákvörðunarvald í öllum málum sem samningur þessi fjallar um og hefur yfirumsjón með framgangi og þróun einstakra verkefna. Ef upp koma hugmyndir um ný verkefni og/eða aukið samstarf skal fyrst leita til nefndarinnar og munu fulltrúar í henni vinna að málinu innan sinnar stofnunar.

Nefndin setur sér starfsreglur þar sem kveðið er á um hvernig mál skulu undirbúin og tekin til afgreiðslu, með hvaða hætti bindandi ákvörðun verður tekin og önnur atriði sem máli skipta. Samstarfsnefnd skal funda reglulega. Samstarfsnefnd skal halda fundargerðir þar sem ákvarðanir hennar skulu skráðar.

Samstarfsnefnd getur falið öðrum aðilum innan stofnana stjórn einstakra verkefna eða samstarfsþátta. Stjórnendum verkefna skal sent erindisbréf þar sem nánar er fjallað um verkefni, heimildir og verksvið.

5. gr.

Samstarfsvettvangur

LSH og FSA eiga nú þegar formlegt samstarf á mörgum sviðum (sjá viðauka 1). Stefnt er að auknu samstarfi vegna þjónustu við sjúklinga, kennslu og fræðslumála, rannsókna, rekstrar og á sviði upplýsingatækni.

Þjónusta við sjúklinga

Til að stuðla að styttingu biðlista áforma sjúkrahúsin að hafa upplýsingar á vefsíðum sínum þar sem fram kemur hversu margir bíða ákveðinnar meðferðar. Þannig geta upplýsingar um biðlista verið öllum aðgengilegar og sjúklingar geta leitað eftir þjónustu þar sem bið er styttri ef þeir óska. Jafnframt verða kannaðir möguleikar á samstarfi á sviðum þar sem biðlistar eru langir. Það verði og metið á hvern máta æskilegt er að flytja sjúklinga og starfsfólk á milli sjúkrahúsanna ef óvænt atvik leiða til að slíkt verði nauðsynlegt.

Semja þarf um verkaskiptingu í slysa- og bráðalækningum (sbr. viðauka 2).

Kennsla

Starfsemi heilbrigðisvísindagreina Háskóla Íslands fer að mestu leyti fram í tengslum við LSH. Vegna þess hafa LSH og H.Í. komið sér saman um víðtæka samvinnu á sviði kennslu og vísinda með gerð samstarfssamnings. Á FSA er háskólastarfsemi fyrir hjúkrunarfræði- og iðjuþjálfanema sem stunda nám við Háskólann á Akureyri. Einnig koma læknanemar í starfskynningu á FSA á fyrri stigum námsins.

Spítalarnir telja æskilegt að styðja við kennslu í heilbrigðisvísindagreinum utan Reykjavíkur og stefna að auknu samstarfi á sviði kennslu og munu m.a. gera tillögur til læknadeildar Háskóla Íslands um að læknanemum gefist kostur á því að stunda hluta námsins á FSA.

Jafnframt mun verða kannað hvort æskilegt sé að hafa samvinnu um gerð samninga við Háskóla Íslands og Háskólann á Akureyri.

Fræðsla

FSA hefur öðlast þekkingu og reynslu í notkun fjarfundabúnaðar til miðlunar á fræðslu og kennslu og sendir m.a. út nær alla þá kennslu og/eða fræðslu sem fer fram á FSA fyrir lækna og hjúkrunarfræðinga um svonefnda byggðabrá. Stefnt verður að því að sett verði upp samskonar þjónusta á LSH og kerfin samtengd svo hægt verði að miðla fræðslu og kennslu á milli stofnananna og til annarra stofnana eftir atvikum.

Vísindarannsóknir

Á LSH hefur að undanförmu verið unnið að reglum um notkun rannsóknagagna, um hugverkarétt og um umsýslukostnað. Hefur þessi vinna farið fram í samstarfi við Háskóla Íslands. LSH og FSA stefna að samræmingu reglna á sviði vísindarannsókna, til að styðja við vísindarannsóknir og auðvelda samstarf einstakra vísindamanna.

Gæðastarf

Starf á sviði gæðamála er báðum sjúkrahúsunum mikilvægt. LSH og FSA munu þróa samstarf á þessu sviði og leitað verður leiða til að hafa samræmda staðla á þjónustu sjúkrahúsanna þar sem það á við. Stefnt skal að samvinnu um gerð klínískra leiðbeininga fyrir deildir spítalanna með skipulegu samstarfi þeirra stafsmanna spítalanna sem að þessum málum vinna..

Upplýsingatækni

Á undanförmum misserum hefur á LSH verið unnið að greiningu á þörfum heilbrigðis-kerfisins fyrir hugbúnað, vegna gerðar sjúkraskrárkerfa. Svipuð vinna hefur einnig farið fram á FSA. Til að nýta þekkingu sem best munu spítalarnir eiga samstarf um þessi mál til að miðla upplýsingum og tækni og til að draga úr tvíverknaði. Meðal annars munu FSA og LSH hafa náið samstarf um þróun rafrænnar sjúkraskrár.

Sjúkrahúsin hafa keypt sameiginlegan hugbúnað fyrir rannsóknardeildir, sem verið er að gangsetja, og munu áfram leitast við að hafa samvinnu við val á upplýsingakerfum og efna til sameiginlegra innkaupa þar sem það reynist hagkvæmt. Samstarf verður m.a. haft um innleiðingu og starfrækslu PAX kerfis, en það er stafrænt og filmulaust umhverfi á sviði myndgreiningar.

Persónuvernd

Til að stuðla að markvissu samstarfi á sviði heilbrigðisþjónustu og við vísindarannsóknir munu aðilar hafa samstarf í málum er lúta að persónuvernd.

6. gr.

Starfsmannamál

LSH og FSA munu hafa með sér samstarf á sviði starfsmannamála til að samræma afstöðu og auðvelda þannig samstarf stofnananna.

Starfsmannaskipti

LSH og FSA munu opna möguleika á starfsmannaskiptum, þannig að starfsfólk í sem flestum starfsstéttum geti farið til náms- og starfsdvalar milli sjúkrahúsanna.

Sjúkrahúsin munu vinna að samhæfingu hvíldarákvæða og útfærslu þeirra hjá ýmsum starfsstéttum svo sem hjá læknum og hjúkrunarfræðingum.

Klínísk starfsþjálfun hjúkrunarfræðinga

LSH og FSA munu eiga samstarf um klíníska starfsþjálfun þannig að hjúkrunarfræðingar á kjörári eigi kost á að taka hluta þjálfunarinnar á FSA og hjúkrunarfræðingar sem eru á sérleið t.d. í skurð-, svæfinga- eða gjörgæslunámi geti takið hluta námsins við LSH.

Ráðning og kennsla aðstoðarlækna

LSH og FSA munu kanna hvort æskilegt sé að auglýsa stöður sameiginlega og hafa samstarf um ráðningu og kennslu aðstoðarlækna (læknakandidata), m.a. með sameiginlegu námskeiðahaldi og fundum.

7. gr.**Fjárhagslegur rekstur og upplýsingar**

LSH og FSA lýsa vilja til hafa með sér samvinnu á sviði fjármála, reksturs og í heilbrigðistækni. Dæmi um sameiginleg verkefni geta verið á sviði innkaupa, kostnaðargreiningar, hagnáms, útgáfa starfseminna, nýsköpun í hagnýtingu upplýsinga um fjármál, starfsemi spítalanna og rekstrarstjórnun.

8. gr.**Gildistími samnings**

Samningur þessi gildir í eitt ár og framlengist sjálfkrafa um eitt ár í senn sé honum ekki sagt upp með sex mánaða fyrirvara af hálfu annars aðilans.

Akureyri, 25. nóvember 2002

f.h. Landspítala - háskólasjúkrahúss

f.h. Fjórðungssjúkrahússins á Akureyri

Magnús Pétursson

Halldór Jónsson

Viðauki 1.

Núverandi samstarf LSH og FSA

LSH og FSA eiga nú þegar í formlegu samstarfi á mörgum sviðum og í gildi eru samningar varðandi eftirfarandi atriði:

1. Þjónustu krabbameinslæknis
2. Þjónustu heila- og taugaskurðlæknis
3. Þjónustu HNE læknis
4. Ráðgjöf vegna sýklarannsókna
5. Þjónustu meinafræðings
6. Þjálfun hjúkrunarfræðinga á sérdeildum svo sem nýburagjörgæslu, gjörgæslu- og slysadeild.
7. Þjálfun nema í ljósmóðurfræði
8. Ráðgjöf hjúkrunarfræðinga vegna kviðskilunar.
9. Úrlesturs heilalínurita.

Viðauki 2.

Samstarfsverkefni LSH og FSA sem eru í undirbúningi

LSH og FSA áforma að koma á formlegu samstarfi á mörgum sviðum og auka með því möguleika sjúklinga á að leita meðferðar á hvoru sjúkrahúsinu fyrir sig ef þeir óska, t.d ef þeir geta þá vænst styttri biðtíma eftir aðgerð. Munu aðilar eftir föngum opna möguleika til aðgangs að klínískum upplýsingum hvort sem þær eru varðveittar á LSH eða FSA. Slíkt aðgengi getur verið forsenda markvissrar þjónustu við sjúkling, aukið öryggi hans og jafnframt opnað möguleika til hagræðingar í rekstri.

LSH og FSA hafa hafið viðræður um verkaskiptingu í slysa- og bráðalækningum.

Samstarf í lækningum

LSH og FSA áforma því að hefja gerð samninga um samstarf meðal annars á eftirfarandi sviðum.

- ?? Þvagfæraskurðlækningum,
- ?? Slysa- og bráðalækningum
- ?? Kvensjúkdómalækningum,
- ?? Skurðlækningum
- ?? Bæklunarskurðlækningum
- ?? Augnlækningum
- ?? Meltingafæralækningum
- ?? Hjartalækningum
- ?? Barnalækningum

Samstarf í hjúkrun

FSA hefur um árabil haft samráð við LSH um notkun sjúklingaflokkunarkerfis. Nú er skráning í sjúklingaflokkunarkerfið á LSH komið á rafrænt form í legudeildarkerfinu LEGU, sem gerir þetta samstarf erfiðara og einnig hefur LSH nú tekið upp nýja útgáfu af sjúklingaflokkunarkerfinu. Munu FSA og LSH koma á formlegu samstarfi um sjúklingaflokkun til að skráning verði markviss og sambærileg milli stofnanna. Jafnframt áforma LSH og FSA að hefja gerð samninga um ráðgjöf hjúkrunarfræðinga vegna hjúkrunarmeðferða. LSH og FSA stefna að því að taka upp samstarf í klínískum hjúkrunarrannsóknum og nýta í því samstarfi þá möguleika sem opnast við sameiginleg rannsóknastörf.